

Segun Prome Minister Nelson Oduber:

“Mi no ta kere y ni imagina cu Minister di Labor y DIMAS ta coopera pa Riu haya mas di 400 trahador di afor lagando nos Arubianonan sin trabao”



STA. CRUZ -- Den e ultimo dianan aki Riu Hotel ta hopi den boca di pueblo, unda cu ta wordo treci padilanti cu Prome Minister di Aruba tin Riu Hotel bao di su halanan y ta proteg'e sin tene cuenta cu su propio Arubianonan cu ta biba aki na Aruba.

Pero sinembargo Prome Minister di Aruba, sr. Nelson Oduber ta trece padilanti cu e unico relacion cu e tin cu Riu Hotel ta cu nan a cumpra un

hotel na Aruba, unda cu sr. Luis Riu a presenta su mes y cu tin un team negociador bao di sr. Mito Martes cu ta negocia cu gerente di Hotel Riu. Prome Minister ta splica cu bao di su maneho y decision cu a cay den ministerraad, Hotel Riu a haya 10 trahador mescos cu cualkier otro hotel cu proyectonan grandi y e 10 trahadonan ey ta describi

den e carta cual a wordo manda pa Hotel Riu. Segun Prome Minister e resto di trahadonan tur lo mester pasa via di Departamento di Labor y via DIMAS. Prome Minister a trece padilanti cu DIMAS ta firma solamente si Departamento di Labor duna un resultado positivo.

Pa loke ta trata e conflicto laboral, e unico intermediacion ta cu ora abogadonan na Aruba a siña Luis Riu pa no cumpra Silver Moon, sino e hotel ey. Na momento cu esey a sosode na ningun momento nan no tin obligacion cu e trahadonan.

Segun Prome Minister na momento cu a mira cu FTA, tabata tin e intencion di bay Juez y cu nan lo bay perde. Prome Minister a yama sr. Luis Riu pa bis'e cu aki na Aruba bo no por cuminza cu un problema y sr. Luis Riu a dicidi di pone un paar di

miyon pa resolve e problema cu e trahadonan di Hotel Riu. Prome Minister a trece padilanti claramente cu e no tin mas envolvimiento cu Hotel Riu. Prome Minister di Aruba a splica cu ta bon pa Minister di Labor y tambe Minister cu ta trata e hendenan di exterior mira e situacion aki mas di cerca y e wordo regla. Un punto si cu sr. Luis Riu a trece padilanti pa Prome Minister di Aruba ta cu si e bay Corte no tin ningun acuerdo cu ningun hende. Minister Ramon Lee sa e sey y una vez cu e trahadonan a bay Corte pa loke ta trata full e caso aki, e no tabata tin empleado den servicio y legalmente ta asina. Segun Prome Minister si tin cualkier convenio cu no a wordo respeta tin otro cosnan tambe cu a sosode. Pero sinembargo Prome Minister a bisa cu Minister Ramon Lee por amplia mas

riba e caso aki. Tambe Prome Minister a trece padilanti cu un punto si cu el'a wordo informa door di Minister Lee ta cu Hotel Riu a duna masha hopi hende trabao cu ta carga e paspoort Hulandes pero cu ta wordo critica cu no ta Hulandes.

Na momento cu un Arubiano casa cu un hende di afor of un persona cu bini for di un isla di afor cu un paspoort Hulandes, ta Hulandes e ta y ta Hulandes e ta keda.

Prome Minister ta splica cu e por a tende hopi expresion den e ultimo temponan aki y e ta kere cu nan tur por para pa loke nan a expresa.

Prome Minister no ta kere y no ta ni imagina cu Minister di Labor of Minister di DIMAS ta coopera pa Hotel Riu por haya un cantidad di 400 trahador di afor anto 20 Arubiano so lo haya trabao na Hotel Riu.